

Fiscal ta haya cu mester baha man duro

PADRASTRO A COMETE ACTONAN INMORAL CU MUCHA MUHER DI 8 AÑA

A exige castigo di 3 aña y 6 luna di prison

ORANJESTAD(AAN) -- Ayera e homber W. mester a presenta dilanti Juez pa duna cuenta di e delito cu el a comete.

Notable tabata cu W. tabata kier pa e caso worde trata cu porta cera, esta cu tur hende mester bandona sala.

Fiscal mr. Lugo a protesta contra e peticion di W. y a bisa cu pa bienestar general Ministerio Publico a dicidi di trata casonan immoral cu porta habri ya cu a keda constatada cu awor cu ta trata e casonan cu porta habri, hopi denuncia a drenta na KZP.

Ta asina cu mayoria di e casonan di immoralidad ta socede den famia y hopi biaha e famia tin e pensamento erroneo di no haci denuncia pa-

sobra asina tur hende ta haya sa.

Desde cu Corte a laga prensa publica e casonan, caminda tin palabracion cu no ta publica number di e victima y no ta publica e caso di tal forma cu uno ta haya sa cual famia e ta, masha hopi caso a keda registra.

Juez mr. Vroom a bisa cu e tambe ta comparti e pensamiento di Fiscal y pesey ta rechaza e peticion di e acusado.

E padraastro W. di (47) aña ta worde acusa cu diferente biaha entre November 1990 y Januari 1993 el a comete actonan immoral cu yiu muher di 8 aña. Durante interrogacion, W. a admiti su culpabilidad.

Den Corte a worde describi

ampliamente den ki forma e actonan immoral tabata tuma lugar y mester bisa cu apesar cu no tabatin penetracion, ta trata aki di un caso hopi baho.

Durante tratamento di e caso, e acusado a bisa cu e ta lamenta loke a pasa.

Fiscal mr. Lugo a remarca cu W. ta lamenta pero lamenta di kico. El a puntra W. si acaso el a pensa kico e victima lo a pasa aden y ta pasando.

Mr. Lugo ta haya cu a keda legalmente prueba cu W. a comete actonan immoral cu su yiu.

Fiscal ta haya e caso aki uno hopi serio. Segun ley, por impone un castigo maximo di 6 aña di prison. E ta di opinion cu e acusado ta considera e

victima como su "sex partner".

Apesar cu e victima ta worde trata y guia, nunca e lo keda normal. Pa resto di su bida, e victima lo keda un experiencia amargo.

El a remarca cu envez di e padraastro ta percura pa e mucha mientras cu e mama ta traha, e tabata abusa di e mucha.

Fiscal a tene cuenta cu e hecho cu durante un tempo largo y cu frecuencia W. tabata abusa di e mucha. Fiscal ta di opinion cu den casonan asina no por tin excuus y mester baha cu man duro. El a exige 3 aña y 6 luna di prison kitando e tempo cu el a pasa den detencion preventivo.

Abogado mr. van der Kuyp ta kere cu frustracion ta hunga un factor importante den e caso aki. E rapport di reclasering ta duna un imagen completo di loke W. a pasa aden.

E ta haya cu Fiscal no a tene cuenta cu esaki. Segun e abogado, su cliente ta coniente cu e mester di ayudo y ta kere cu ora e worde poni den libertad, e mester worde poni bao guia di reclasering.

Juez a cera tratamento di e caso y a bisa cu dia 14 di Mei e lo dicta sentencia.